



Naqqiut

Siunnersuut 27. Marts 2024-meersoq taarserpaa

(Makku naqqiutigineqarput - siunnersuuteqartup aqqi naqqiutigineqarpoq – malitsigisaanillu oqallisissiami oqaatsit naqqinneqarlutik)

Inatsisartut Suleriaasianni § 36 naapertorlugu oqallisissiatut siunnersuut imaattoq matumuuna saqqummiuppara:

Aalisarneq pillugu EU-mut isumaqatigiissutip sivitsorneqannginnissaa aammalu EU-mi OCTA-mut ilaasortaajunnaarnermi pitsaaqutissat ajoqutissallu pillugit oqallisissiaq.

(Inatsisartut gruppiat, Naleraq)

Ullumikkut Kalaallit Nunaat Danmarkimit pigineqarnerata kingunerisaanik, danskisullu tamatta innuttaassuseqarnerput ilutigalugu, sulii EU-mut ilaasortaasutullusooq inissisimavugut. Aalisagartaatigullu sallunaveeqqutigalugit nunarput Danmarkimut aamma EU-mut pituttorneqarluni.

Ilaasa oqaatigisaraluarpaat “Aaligooq EU-mit anigutta pitsaanerulissasoq”, puigorlugulu aninikuugalualuta, iluaqut ataasiinnarluunniit pigilernikuunnginnatsigu sulii Danmark pigisaatut OCTA-mi ilaasortaaginnavissimagatta. Danmark/EU kisiat aqqutigalugu niuertarluta.

Nunanut allanut niuerneq ajornitta kingunerisaanik, aalisagartaatigut tamarmik Danmark aqqutigalugu annissorneqarput. Nunatsinniillu nalillit Danmarkimut annissorneqartuarnissaat qulakkeerniarlugu, Danmarkip akisussaaffigisaa “Fødevarestyrelse” nunatsinni piorsarnagu. Namminersornermut Inatsit malillugu Danmark pisussaaffeqarpoq akisussaaffiit ullutsinnut naleqquttumik piorsarnissaat. Tamanna piunngilaq, akerliani nunasiaatitut sulii ingerlatsillutik, pissaanillit nalilinnik pajuttorlugit.

Allaammi Savalimmiormiut nunasiaataasimanatik Kalaallit Nunaaniit siuarsimanerujuupput, taamatut pituttoqqanngimmata. Danmark aporfileruisuutinnginnamikkit niuernerminnut.

Taamaammat piffissanngorpoq Kalaallit Nunaat EU-mut niueqatigiinnissamut isumaqatigiissusior-nissaa, kisianni aalisagartaatigut sallunaveeqqutiginagit naligiittulli suleqatigiinnissaq aneersaalugu ingerlanissaq.

Qularinngilarput ullumikkut inatsiserpassuit allaffissornaqisut piumasaqaataajunnaarlugit isumaqatigiinniarnermi issittormiuunerput nunattalu inoqqortussusaa qiviarlugu, eqaannerusumik isumaqatiginniartoqarsinnaassasoq.



Kalaallit Nunaata EF-imut naameerluni nalunaaruteqaraluarnera kiisami timitalerneqassagaluarpoq nunatsinnilu innuttaasunut iluaqutissaa malunnartinneqarsinnaalerluni.

EU-mi nunatsinniik sinniisoqarfeqareeratta, Tuluillu Nunaat isumaqatigiinninniarfigalugit misilittagaqarfigilereerlugit, nunatsinnut annerusumik kingunissaqanngilaq. EU-mut isumaqatigiissuteqassanngikkaluarutta nunarput ajornerusumik inissinnaviannngilaq, EU-mi innuttaasut taamaallaat eqqugaassapput nunatsinniik tunisassiat eqqussinermi akileraarutilersorsinnaammata. Uagullu EU-mit nioqutissat akileraarutilersornaviarnagit.

Tuluit Nunaallu niueqatigiinnerput Brexit-imiillu misilittakkat takutippaat niueqatigiinnerput annerusumik eqqugaanngitsoq, nioqutissaatigut EU-mit (Danmark) Tuluit Nunaannut akileraarutilersorneqaraluartut takutippaat niueqatigiinneq annerusumik eqqugaanngitsoq.

Taamaaliornikkut EU-p malittarisassai annertoorujussuit uatsinnut allaffissornikkut "Nemid-llu" pisariillinerulissagaluarput.

Taamatuttaarlu nunarput issittormiutut immikkuullarissuserput takutissavarput, nunallu allat aalajangiiffisassaanut annertuunut maniguutiinnarnata.

Apeqqummik pingaaruteqarluinnartumik pitsaasumik piviusorsioortumillu oqallinnissaq qilanaaralugu.